

Samþykkt fyrir ungmennaráð Ísafjarðarbæjar

1. gr. Stofnun og tilgangur

Bæjarstjórn Ísafjarðarbæjar telur mikilvægt að íbúar bæjarins hafi sem mest áhrif á ákvarðanir sem snerta líf þeirra og afkomu. Í því skyni að gefa ungmennum bæjarins tækifæri til að láta rödd sína heyrast er stofnað til ungmannaráðs á grundvelli æskulýðslaga nr. 70/2007. Í 11. gr. laganna segir: „Sveitarstjórnir hlutast til um að stofnuð séu ungmannaráð. Hlutverk ungmannaráða er m.a. að vera sveitarstjórnunum til ráðgjafar um málefni ungs fólks í viðkomandi sveitarfélagi. Sveitarstjórnir setja nánari reglur um hlutverk og val í ungmannaráð.“

Tilgangur ungmannaráðs Ísafjarðarbæjar er að skapa vettvang og leiðir til þess að gera ungmennum kleift að koma hugmyndum og skoðunum sínum á framfæri m.a. við kjörna fulltrúa sveitarfélagsins auk þess að veita ungmennum fræðslu og þjálfun í lýðræðislegum vinnubrögðum.

Ungmannaráð starfar í umboði bæjarstjórnar í samræmi við samþykkt um stjórn Ísafjarðarbæjar og fundarsköp bæjarstjórnar.

2. gr. Hlutverk

Hlutverk ungmannaráðs er að vera vettvangur ungmenna til að hafa áhrif á næsta umhverfi sitt. Sem dæmi um starfsemi ungmannaráðs má nefna:

- Ungmannaráð getur komið með ábendingar um öll málefni sveitarfélagsins.
- Ungmannaráð getur staðið fyrir og auglýst fundi og boðið til þeirra kjörnum fulltrúum, embættismönnum og/eða öðrum aðilum sem mál varðar hverju sinni.
- Ungmannaráð getur beitt sér fyrir bættri þjónustu við börn og ungt fólk.
- Ungmannaráð getur haft samráð við foreldrafélög framhalds-, grunn- og leikskóla um málefni barna og unginga.
- Ungmannaráð getur staðið fyrir viðburðum.
- Ungmannaráð hefur upplýsingasíðu á heimasíðu Ísafjarðarbæjar og ber ábyrgð á að koma réttum upplýsingum á framfæri við tengilið Ísafjarðarbæjar.

Nefndir og ráð bæjarins skulu senda ungmannaráði til umsagnar öll málefni sem snerta ungt fólk sérstaklega og getur boðað fulltrúa ungmannaráðs til sín.

3. gr. Skipan í ungmannaráð

Ungmannaráð starfar samkvæmt beinu lýðræði. Með því fyrirkomulagi hafa allir möguleika á að koma hugmyndum sínum á framfæri og hafa áhrif á málefni sveitarfélagsins. Ábyrgðin dreifist yfir hópinn og fleiri einstaklingar taka virkan þátt í starfi Ungmannaráðs Ísafjarðarbæjar. Þeir einir hafa rétt til þátttöku í ungmannaráði Ísafjarðarbæjar sem hafa lögheimili í sveitarfélaginu og eru á aldrinum 13 til 25 ára.

4. gr.

Fundir

Ungmennaráð skal funda a.m.k. þrisvar sinnum á ári. Fulltrúar í ungmannaráði fá ekki greitt fyrir fundarsetu. Formaður ungmannaráðs boðar til funda, ákveður dagskrá í samráði við sviðsstjóra íþróttas- og tómstundasviðs og stýrir fundum ráðsins.

5. gr.

Þjónusta Ísafjarðarbæjar við ungmannaráð

Til að greiða fyrir starfsemi ungmannaráðs beinir Ísafjarðarbær þeim tilmælum til stofnana bæjarins að þær veiti ungmannaráði aðstöðu til fundahalds án endurgjalds. Íþróttas- og tómstundanefnd ákveður ár hvert fjárframlag til ungmannaráðs sem ætlað er til að greiða t.d. pappír, póstburðargjöld, veitingar og fleira samanber hlutverk þess.

Umsjónamenn félagsmiðstöðva og sviðsstjóri skóla- og tómstundasviðs aðstoða ungmannaráð við upplýsingaöflun úr stjórnsýslunni ásamt því að birta fundargerðir ráðsins á vefnum. Íþróttas- og tómstundanefnd hefur fræðsluskyldu gagnvart fulltrúum í ungmannaráði.

Fundargerðir ungmannaráðs eru birtar á vef Ísafjarðabæjar. Fundargerðirnar eru tekna til kynningar á fundum bæjarstjórnar og íþróttas- og tómstundanefndar.

6. gr.

Samskipti

Íþróttas- og tómstundanefnd og sviðsstjóri skóla- og tómstundasviðs eru tengiliðir ungmannaráðs við sveitarfélagið.

Einu sinni á ári boðar bæjarstjórn ungmannaráð til fundar þar sem ungmannaráð getur komið sínum áherslum á framfæri.

Einu sinni á ári boðar íþróttas- og tómstundanefnd ungmannaráð til fundar þar sem farið er yfir störf þess, hlutverk þeirra og framtíðarsýn.

Ungmannaráð kemur erindum sínum á framfæri við bæjarstjórn eða stjórnsýslu bæjarins með formlegum hætti, þ.e. með bréfi eða tölvupósti. Ísafjarðarbæ ber að svara erindum með bréfi eða tölvupósti.

Samþykkt í bæjarstjórn Ísafjarðarbæjar xx. nóvember 2017